

**ANG**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Bayan

Taon XXXIX Blg. 18
Setyembre 21, 2008
www.philippinerevolution.net

Editorial

Labanan ang interbensyong militar ng US sa bansa



Taliwas sa pinalalabas na pansamantala lamang ang mga “bumibisitang” tropang Amerikano sa bansa, permanente nang nakaistasyon sa Pilipinas ang mga ito. Mula noong 2001, nang turan ng rehimeng Bush ang Pilipinas bilang “ikalawang larangan” ng pandaigdigang teroristang gera ng US, papalaki at papalawak ang pagtulak at paglahok ng mga tropang Amerikano sa panggegera ng Armed Forces of the Philippines (AFP) sa mga armadong pwersa sa Mindanao.

Imbwelto ang mga tropang Amerikano sa paniniktik, pag-aarmas at pagsasanay ng mga sundalo ng AFP. Tuwiran silang lumalahok sa mga operasyong pangkombat. Dahil sa permanenteng presensyang militar nito sa Pilipinas, nagagawa ng US na suhayan ang papet na rehimen at protektahan ang kapangyarihan ng US sa Southeast Asia.

Ang tuluy-tuloy na presensya ng mga tropang ito sa bansa ay binibigyang-matwid ng Visiting Forces Agreement (VFA) na minamaniobra at iniikutan kailanman naisin ng US.

Kinukomoplahe ang kanilang permanenteng presensya sa anyo ng pana-panahong “joint military exercises” na inilulunsad ilambeses sa isang taon.

Ang pangmatagalan nang mga tropang militar ng US sa bansa ay kabilang sa Joint Special Operations Task Force-Philippines (JSOTF-P). Itinayo ito mula sa halos kalahati ng 1,200-kataong pwersa ng Joint Task Force-510 (JTF-510) na ipinadala sa Mindanao ng US Pacific Command noong Enero 2002 at nanatili roon hanggang Hulyo 2002. Naging tungkulin ng JTF-510 na “hawanin” ang isla para sa paglulunsad ng “Operation Enduring Freedom-Philippines.”

Ginagamit ng mga tropang Amerikano sa JSOTF-P ang

**Mga tampok sa
isyung ito...**

Antipyudal na
pakikibaka sa Eastern
Samar
PAHINA 6

Korapsyon sa Court
of Appeals
PAHINA 9

Ibayong pagbulusok
ng ekonomya ng US
PAHINA 12

mga pakulo nilang proyektong sibi-ko-militar bilang tabing sa aktwal at tuwirang paglahok ng mga ito sa mga operasyong militar—mula sa mga operasyong *reconnaissance* at paniktik, lohistika at iba pang suporta sa kombat hanggang sa paglahok sa aktwal na kombat.

Upang suhayan ang kanilang mga operasyon, nagtatatag ang JSOTF-P ng mga kongkretong pasilidad at imprastruktura sa loob ng ilang kampo militar ng AFP sa Mindanao. Mahigit 300 tropa nito ang nakakampo sa isang bahagi ng Camp Navarro ng AFP Western Mindanao Command (Westmincom) sa Zamboanga City. Papalaki rin ang sariling *air asset facility* ng JSOTF-P sa loob ng Zamboanga City International Airport. Mayroon pa itong sariling daungan sa Majini Pier sa loob ng Westmincom Naval Base at hiwalay na pasilidad sa Camp Arturo Enrile sa Malagutay, Zamboanga City.

Walang karapatang makialam ang mismong mga upisyal ng AFP sa mga aktibidad na isinasagawa ng mga pwersang Amerikano sa loob ng mga pasilidad na ito. Maging ang mga pinakamatataas na pinuno ng AFP rito ay hindi pinapapasok

sa mga pasilidad na ito na nasa loob ng sarili nilang mga kampo. Ang sinumang may kailangang kausaping nagtatrabaho sa mga pasilidad na ito ay kailangan pang humingi ng upisyal na pahintulot mula sa US Embassy.

Walang kahihiyan at sukdulan ang pagpapakapapet ni Arroyo sa harap ng tahasang paglapastangan ng imperyalistang US sa soberanya ng bansa. Ang lumalalim at lumalawak na interbensyong militar ng US sa Pilipinas ay bunga ng todo-todong pakikipagkutsaba rito ng rehimeng Arroyo at ng AFP. Tinatangkilik at hinihingi ng rehimeng Arroyo ang panghihimasok-militar ng US, kapalit ang patuloy na suporta ng amo nitong imperyalista at iba pang “ayuda” mula sa US.

Sangkot ang mga sundalong Amerikano hindi lamang sa mga operasyon laban sa bandidong Abu Sayyaf, kundi pati sa pinatitinding gera laban sa Bangsamoro at iba pang rebolusyonaryong pwersa. Nitong nagdaang mga taon, umasta ang US sa publiko na sumusuporta umano ito sa usapang pangkapayapaan ng GRP at MILF sa layuning matapos ang armadong paglaban ng Bangsamoro at mabigyang-daan



ang pagbwelo pa ng mga “ayuda” at negosyo ng US sa Mindanao. Subalit sa kabiguang mabitag ang MILF, nakatuon ngayon ang militar ng US sa pagsuporta sa AFP sa digma laban sa mga rebolusyonaryong armadong pwersang Moro.

Sa ngayon, Mindanao ang pangunahing larangan ng direktang panghihimasok-militar ng US sa Pilipinas. Kalakhan ng mga pwersa nito ay nakatuon sa mga operasyon laban sa Abu Sayyaf at MILF. Subalit kaalinsabay nito, pinupuntirya rin ng mga mapanghimasok na tropa ng US ang mga pwersang pinakamilitante at pinakapursigidong kumakalaban sa imperyalismong US sa Pilipinas—ang mga pambansa-demokratikong rebolusyonaryong pwersa.

Nananawagan ang PKP sa mamayang Pilipino na pag-ibayuhin ang paglalantad, pagkundena at pagbaka sa nagpapatuloy na presensyang militar at sa lumalawak at lumalalim na interbensyong militar ng US sa bansa. Tanging ang determinadong pakikibaka ng lahat ng mga patriyotikong pwersa sa bansa para patalsikin ang mga mapanghimasok na tropa ng US at labanan ang imperyalistang paghahari sa Pilipinas ang makapipigil sa pag-umang ng pangit na mukha ng panghihimasok-militar ng US sa bansa. AB



Taon XXXIX Blg. 18 Setyembre 21, 2008

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial : Labanan ang interbensyong militar ng US sa bansa	1
Mga tropang Amerikano sa kombat	3
Pananalanta ng pasistang estado	
Militarisasyon sa Mindanao	4
Mga kaswalti ng AFP	4
Militar, inutusan ng CA na palayain sina Cadapan, Empeño at Merino	6
Mga Ulat Koresponsal	
Pakikibakang antipyudal sa Eastern Samar	6
Martir ng Sierra Madre	8
Korapsyon sa Court of Appeals	9
Anomalya sa "subsido" sa agrikultura	10
Mga biktima ng pagtatrabaho sa Hanjin	11
Iligal na pagsibak sa mga manggagawa	11
Sa ibayong dagat	
Ibayong pagbulusok ng ekonomya ng US	12
Pagsalba sa mga kapitalista sa pinansya	13
Balita	14

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Paglahok ng mga tropang Amerikano sa mga operasyong kombatan

Sa dami na ng mga insidente ng tuwiran at di tuwirang paglahok ng mga pwersang Amerikano sa mga operasyong militar sa bansa, nagkandabuhol-buhol na ang mga pangangatwiran ng mga opisyal ng guberno at militar ng US.

Di na naiwasang aminin ni Gen. Alexander Yano, hepe ng AFP, na ang mga sundalong Amerikano sa Pilipinas ay nagsasagawa ng mga aktibidad na "may kaugnayan sa kombatan." Ayon din sa pinuno ng VFA Commission na si Edilberto Adan, nakapagpapadala ora mismo ang militar ng US ng impormasyong paniktik (*real-time intelligence*) na umaayuda sa mga atake sa lupa at pambobomba ng AFP sa mga pusisyon ng MILF.

Inamin ito mismo ng US Embassy.

Gayunpaman, pinalalabas pa rin nila na hindi umaabot sa kombatan ang papel ng US sa mga operasyon ng AFP. Binabaluktot nila ang katotohanang walang tuwirang kinalaman sa kombatan ang ibinibigay nilang ayudang paniktik at panlohistika. Pinagtatakpan rin nila ang madalas nang nabubunyag na partisipasyon ng mga pwersang Amerikano sa aktwal na kombatan.

Sumusunod ang ilan lamang sa marami nang dokumentadong insidente ng direktang paglahok ng mga tropang militar ng US sa mga operasyong paniktik, pangkombatan at iba pang operasyong militar sa bansa:

Agosto 2008 hanggang sa kasalukuyan. Patuloy ang tuwiran at di tuwirang paglahok ng mga sundalong Amerikano sa mga operasyon ng AFP laban sa MILF sa mga prubinsya ng Cotabato, Lanao del Norte at Sulu. Noong Agosto 30, kabilang ang isang sundalong Amerikano sa komboy ng AFP na tinambangan ng mga bandidong Abu Sayyaf sa Bombon, Patikul, Sulu.

Noong Agosto 24, nakunan ng litrato ang mga sundalong Amerikano na hawak ang isang "drone" (eroplanong pang-espiya na pinalilipad ng *remote control*) sa loob ng kampong ng Philippine Army sa Datu Saudi Ampatuan, Maguindanao sa panahong kinakanyon ng AFP ang pinupwestuhan ng mga pwersa ng MILF.

Hulyo 2008. Kasama ng mga tropang Pilipino ang apat na sundalong Amerikano sa pagrerekober ng mga di sumabog na bomba sa Barangay Baliki, Midsayap, North Cotabato. Tumigil sila sa Hill Park Inn sa Midsayap. Humimpil ang naturang mga sundalo sa Ayala Hotel at iba pang lugar sa Iligan City sa kasagsagan ng mga operasyon laban sa MILF sa Lanao del Norte.

Pebrero 2008. Sinalakay ng magkasanib na mga pwersang militar ng US at AFP ang Barangay Ipil, Maimbung, Sulu na ikinamatay ng pitong sibilyan, kabilang ang tatlong babae at dalawang bata, sa hinalang mga tagasupporta umano sila ng Abu Sayyaf. Pinatay din ng mga lumusob na sundalo ang isang nagbabakasyong sundalo ng Philippine Army. Ginamit sa atakeng ito ang mga eroplanong pang-espiya ng US na nagbigay ng impormasyong paniktik sa mga nag-ooperasyong tropa.

Nobyembre-Disyembre 2007.

Iniutos ng mga tropa ng US sa pamumuno ng isang Sergeant Ronburg ang pagsasara ng pampublikong ospital sa Panamao, Sulu at pagpatay ng lahat ng ilaw sa paligid nito tuwing gabi dahil nakakasagabal sa kanilang *combat patrols* ang mga ilaw ng ospital. Pinagbantayan ng mga sundalong Amerikano ang namumuno ng ospital na sinumang makikita sa paligid ng ospital sa gabi ay babarilin.

Pebrero 2006. Gumamit ang mga pwersa ng US ng mga "drone" sa pagtugis sa mga bandidong pwersa ng Abu Sayyaf na pinamumunuan ni Khadaffy Janjalani, ayon mismo kay Gen. Eugenio Cedo, hepe noon ng Western Mindanao Command ng AFP. Bumagsak ang isa sa mga "drone" sa Marang, Indanan, Sulu at nakuha ng mga opisyal ng barangay.

Mayo 2004. Apat na sundalong Amerikanong armado ng mga masinggan ang sumama sa AFP sa paglusob sa Barangay Sipangkot, Sitangkai, Tawi-Tawi sa hinalang pinagpupugaran ito ng mga bandidong Abu Sayyaf. Tatlong residente ang napatay at 11 pa ang binugbog, iligal na inaresto at idinetine, kabilang ang isang nagbabakasyong opisyal ng pulisya.

Hulyo 2002. Sangkot ang isang sundalo ng US sa pagbaril sa sibilyang si Buyongbuyong Isnijal nang sumama ang Amerikano sa mga Pilipinong sundalo sa pagsalakay sa bahay ni Isnijal sa Barangay



Kanas, Tuburan, Basilan.

Hunyo 2002. Nilahukan ng US Navy Seals at ginamitan ng paniniktik mula sa himpapawid ang operasyong pumatay kay Abu Sabaya ng Abu Sayyaf. Isang Amerikanong operatiba ng US Central Intelligence Agency ang nagdirihe ng operasyon mula sa kanyang upisina sa loob ng base militar ng AFP sa Zamboanga City gamit ang impormasyong mula sa “drone.”

Marso 2002. Isa pang “drone” na ginagamit sa paniniktik ng militar ng US ang bumagsak sa karagatan ng Zamboanga City.

May ilang pagkakataon na ring napinsalaan ang mga sibilyan sa paglulunsad ng mga “pinagsanib na pagsasanay-militar” ng AFP at mga tropa ng US.

Noong Setyembre 2006, tinamaan ng mga *shrapnel* sa likod si Buh Bizma nang magpasabog ng bomba ang mga sundalong Amerikano at Pilipino habang naglulunsad ng “joint military exercises” sa Barangay Tagbak, Indanan, Sulu. Noon namang 2003, tinamaan ng ligaw na bala ang sibilyang si Arsid Baharun habang sinasanay ng mga tropang Amerikano ang mga sundalo ng AFP sa *target shooting* sa base militar ng AFP sa Malagutay, Zamboanga City.

Maging sa mga operasyon ng AFP laban sa BHB, napansin na rin ang ilang palatandaan ng pakikialam ng US. Sa ilang pagkakataon sa Central Luzon, Southern Tagalog, Northeastern Mindanao at iba pang lugar, laluna kung saan may isinasagawang *Balikatan exercises* sa malapit, may namataan nang mga hinihinalang “drone” na gumagalugad sa kanugnog na mga larangang gerilya. Madalas ding nakikita ang mga ito bago at sa kalagitnaan ng paglulunsad ng mga operasyon ng AFP. AB

PANANALANTA NG PASISTANG ESTADO



Mga biktima ng militarisasyon sa Mindanao, dumarami

Patuloy na dumarami ang mga biktima ng Moro at di Moro sa Mindanao habang walang tigil ang mga “operasyong pagtugis” ng Armed Forces of the Philippines (AFP) at Philippine National Police (PNP) laban sa mga kasapi ng Moro Islamic Liberation Front-Bangsamoro Islamic Armed Forces (MILF-BIAF).

Nagaganap ang mga ito habang lumalakas ang panawagan sa gubyernong Arroyo hindi lamang ng mga lokal kundi mga internasyunal na organisasyong tulad ng Organization of Islamic Conference (na may 57 myembrong bansa), World Food Programme ng United Nations at International Committee of the Red Cross (ICRC) na tigilan na ang mga labanan sa Mindanao at muling buksan ang usapang pangkapyapaan sa MILF.

Sa kabila nito, di pa rin pinatitigil ni Gloria Arroyo ang mga opensiba laban sa MILF. Di rin niya pinatigil sa Philippine Air Force (“pinalilimitahan” lang) ang mga pambobomba ng eroplano ngayong Ramadan, ang pinakabanal na buwan sa kalendar-yong Islamiko. Di bababa sa limang sibilyan ang na-

Sundan sa “Mga biktima...,” sa pahina 5

Patung-patong ang mga kaswalti ng AFP sa pakikipagsagupaan sa MILF-BIAF

Pitong sundalo ng Armed Forces of the Philippines (AFP) na namatay sa pakikipaglaban sa MILF-BIAF noong Setyembre 17 sa Lanao del Sur ang pinakahuling kaswalti sa nagpapatuloy na mga sagupaan sa pagitan ng mga pwersang Bangsamoro at mga sundalo ng AFP. Nagpapatrulya ang mga reaksyunaryong sundalo ng gubyernong Arroyo nang tambangan sila sa pagitan ng Barangay Calalanaon at Barangay Panglaw Lupa sa Calamogas, La-

nao del Sur. Isang mandirigma ang napatay sa panig ng MILF-BIAF. Ilang oras makaraan nito, sinalakay ng isa pang yunit ng mga gerilyang Moro ang isang detachment ng Philippine Army sa pareho ring bayan kung saan nasugatan ang lima sa mga pwersa ng militar.

Umaabot na ngayon sa 15 ang namamatay at maraming iba pa ang nasusugatang sundalo ng AFP sa loob ng ilang araw na mga sagupaan. Iniulat sa *website* ng

MILF (www.luwaran.com) na walong pwersa ng militar at paramilitar ang namatay nang salakayin nila ang kinakampuhan ng mga gerilyang Moro sa Barangay Bialong, Shariff Aguak, Maguindanao noong Setyembre 12. Mga pwersa ng 66th, 72nd at 73rd IB ang nag-operasyon sa nasabing mga erya. Ayon sa MILF, nagbabayad ngayon ang AFP ng P5,000 sa mga sibilyan sa bawat bangkay ng militar na makukuha nila sa mga lugar na pinaglabanan. AB



"Mga biktima..." mula sa pahina 4

matay at dalawa ang nasugatan sa mga *air strike* nitong Agosto at Setyembre.

68 sibilyan, napatay, daanli-bo napinsalaan. Halos 100 katao ang nagsilikas mula sa kanilang mga tahanan sa Datu Said Ampatuan, Maguindanao isang araw makaraang muling magkasagupa ang mga sundalo ng Philippine Army (PA) at mga mandirigma ng 105th Base Command ng MILF-BIAF noong Setyembre 12.

Iniulat ng MILF na daan-daang bahay ang sinunog ng mga militar at paramilitar sa mga bayan ng Shariff Aguak, Mamasapano, Datu Saudi, Datu Piang at Datu Unsay, lahat sa Maguindanao. Sinalakay ng mga tropa ng 66th, 72nd at 73rd IB-PA ang isang moske sa Barangay Daliao, Maasim, Sarangani habang nagdarasal dito ang ilang mga myembro ng MILF kaugnay ng pag-oobserba nila ng Ramadan. Mariing kinundena ito ng mamamayang Moro dahil anila'y grabeng paglapastangan ito sa kanilang kultural at relihiyosong simbolo.

Sa ulat ng National Disaster Coordinating Council (NDCC) noong Setyembre 16, mayroon nang

514,519 katao ang nawalan ng mga tirahan at kabuhayan sa Autonomous Region of Muslim Mindanao (ARMM) at sa sentral at katimugang bahagi ng Mindanao. Mahigit 100 na ang naitalang napatay (68 dito ay mga sibilyan) mula nang sumiklab ang mga sagupaan sa 15 barangay sa North Cotabato at kumakalat ngayon hanggang sa 66 na munisipalidad ng 11 probinsya ng Central Mindanao, ayon naman sa ICRC.

5 patay, 2 sugatan sa pambo-bomba ng eroplano. Agad na napatay sina Mandy Manunggal, Aida Manunggal (18) na noon ay buntis; King Mande (17), Adtayan Mande (8), Faidza Mande (3), at isang Guimaludin nang mahulugan ng isang bomba ng isang eroplanong OV-10 ang sinasakyan nilang bangka noong Setyembre 8 ng umaga. Sugatan naman sina Bailyn Mande at Atok Mande. Tumatawid ang grupo sa Bugok River sa Barangay Te, Datu Piang nang masabugan sila ng bomba. Naganap ang trahedya habang umiiwas sila sa matinding labanan.

Sa Barangay Montay sa Datu Piang pa rin, isa pang buntis na si Sabaniya Dimautang, 35, ang

napatay nang masabugan ng bomba. Nasugatan ang kanyang anak na si Nor-ada, 15. Nasugatan din ang isang residenteng Lumad at isang kabataang lalaking nagngangalang Buko Intil, 19. Natamaan sila ng kanyong 105 mm.


Sa mismong araw na ito, dalawang eroplano ang nambomba sa mababang bahagi ng Barangay Ni-mao, Datu Piang. Malubhang nasugatan si Bailyn Raya, 10 at Guimaludin Mandi, 13, parehong mga residente ng Sityo Dagading, Barangay Butilen. Nag-aagaw buhay si Raya nang maibalita ang insidente.

Mula noong Agosto 23, kinanyon ng 105 mm ang Barangay Butilen, Datu Piang. Tinamaan at napatay si Homedy Abdulrahman, 16 habang nasugatan sina Rabiyy Abdulrahman, 7 at Ula Ponak, 12. Noong Agosto 28, walang habas na nambomba ang mga eroplano ng militar sa Nimao, Balanaken, Li-ong, Patulang at Nunangan sa latingan ng Liguasan.

Sa ibang bahagi ng bansa

Nakatanggap ng mga mensaheng *text* si Irene Tembreza, isang kasapi ng Abra Human Rights Alliance, na nagbababala sa kanyang nalalapit na pagkamatay sampu ng kanyang pamilya. Kagagawan ang mga pananakot na ito ng mga pwersa ng 503rd IB, ayon sa Cordillera Human Rights Alliance (CHRA). Mula pa noong Hulyo ay sinusubaybayan na ng mga ahen-teng militar si Tembreza dahil sa kanyang partisipasyon sa pagpapahukay at pagpapalibing nang disente sa mga bangkay ng mga pinaghihinalaang myembro ng Bagong Hukbong Bayan.

AB





Militar, inutusan ng CA na palayain sina Cadapan, Empeño at Merino

Isa na namang tagumpay ang nakamit ng mga tagapagtaguyod ng karapatang-tao sa bansa nang utusan ng Court of Appeals (CA) noong Setyembre 17 ang Philippine Army (PA) na palayain ang mga bihag nitong dalawang estudyante ng University of the Philippines (UP) at kasama nilang magsasaka. Nakumbinsi ang CA sa testimonya ng saksing si Raymond Manalo na ibinibimbini sa mga kampo at base ng militar ng 7th Infantry Division ang tatlong nawawala—mga estudyanteng sina Sherlyn Cadapan at Karen Empeño, at si Manuel Merino. Bunsod nito, binaligtad ng nasabing hukuman ang naunang desisyon nito at kinatigan ang petisyon para sa *writ of amparo* at *writ of habeas corpus* ng kanilang mga ina na sina Erlinda Cadapan at Concepcion Empeño. Kasunod nito ay inutusan ang militar na palayain ang tatlo.

Si Raymond Manalo at kapatid niyang si Reynaldo ay dinukot sa San Ildefonso, Bulacan noong Pebrero 14, 2006. Ayon sa CA, malinaw, maliwanag at kapani-paniwala ang testimonya ni Raymond Manalo, at hindi na ito maaaring di pansinin o isaisantabi na lamang. Ayon kay Raymond, nakita at nakausap niya sina Cadapan at Empeño sa mga kampo ng militar sa pagitan ng Pebrero 14, 2006 at Agosto 13, 2007 nang makatakas sila sa kamay ng militar. Nakita nilang tinotortur ang dalawang estudyante. Sa partikular, nasaksihan nila ang paggamit ng “water torture” at pagkuryente kay Cadapan. Nakita rin nila nang patayin si Merino, buhusan ng gasolina ang kanyang bangkay at sunugin. Sina Cadapan, Empeño at Merino ay dinukot sa Hagonoy, Bulacan noong Hunyo 26, 2006. Bagamat di na maitanggi ng PA na nadala nga ang mga nawawalang biktima sa kampo ng 17th ID, itinatanggi pa rin nilang nasa kanila ang mga ito.

Nauna rito, inutusan ng Supreme Court ang Court of Appeals noong Setyembre 11 na palayain si Pastor Berlin Guerrero ng United Church of Christ in the Philippines. Mahigit 15 buwang nadetine ang Protestanteng pastor sa Cavite Provincial Jail sa Trece Martires, Cavite dahil sa gawa-gawang kasong *murder*. Gayunman, walang nakitang ebidensya para maiugnay siya sa pagkamatay noong 1991 ng upisyal ng pulis sa Cavite na si Noli Yatco. Habang hinihintay ang pinal na resolusyon sa kanyang kaso, siya ay nasa pangangalaga ni Atty. Emil Capulong, isa sa kanyang mga abogado.

Si Pastor Guerrero ay dinukot ng mga operatiba ng Naval Intelligence and Security sa harap ng kanyang asawa at mga anak noong Mayo 27, 2007 sa Malaban, Biñan, Laguna. Dinala siya sa isang *safe house* at doo’y tinortur habang pinaaamin ng mga operatibang paniktik na isa umano siyang upisyal ng Partido Komunista ng Pilipinas.

AB

Antipyudal na pakikibaka sa Eastern Samar

Napatunayan ng rebolusyonaryong kilusan sa Eastern Samar na sa pag-oorganisa sa masa at samasamang pakikibaka para sa kanilang interes, maaaring umiral at magpalakas ang BHB kahit sa mga lugar na nasa ilalim ng kontrol at terorismo ng mga pasistang sundalo. Sa pamamagitan ng rebolusyong agraryo, muling nakaugat ang BHB sa dalawang baryo sa Eastern Samar.

Inilunsad noong Hulyo 2007 hanggang Marso 2008 ang antipyudal na pakikibakang masa sa Barangay Mabuhay at Barangay Silangan (mga di tunay na pangalan) sa pamumuno ng mga rebolusyonaryong pwersa roon.

Ang dalawang baryo na ito ay humigit-kumulang isang dekada nang pinupugaran ng mga detasment ng kaaway at nilalatangan ng masinsing lambat-paniktik ng kaaway. Subalit sa kabila ng matinding militarisasyon, nagawa ng mamamayan doon na bumangon at matagumpay na ipaglaban ang kanilang mga interes, kaagapay ng Partido at BHB.

Unang tinutukan ng BHB ang Barangay Mabuhay. Isinagawa ang panlipunang pagsisiyasat at pagsusuri ng mga uri, kasabay ang pagpupursige sa pag-oorganisa at pampulitikang edukasyon sa panibagong buong mga grupong pang-organisa sa hanay ng mga maralitang magsasaka. Sinundan ito ng pag-oorganisa rin ng grupong suporta sa hanay ng mga panggitna at nakataas na saray ng magsasaka, kabilang na ang mga kagawad ng konseho sa barangay. Sa tulong ng mga organisasyong masa, bineripika at pinayaman ang panimulang pagsisiyasat at pagsusuri. Batay dito, tinukoy ang pangunahing mga suliranin ng masa at bina-



langkas ang rekomendasyon para sa mga kahilingan sa mga pakikibakang agraryo.

Para matiyak ang tagumpay ng kampanya, masusing pinagkaisa ng mga mandirigma ang taumbaryo. Pinulong ang bawat grupong pang-organisa ng magsasaka, komiteng pang-organisa ng PKM at bawat grupong suporta. Inihapag sa kanila ang resulta ng pagsusuri sa lugar, mga *case study* at rekomendasyong maglunsad ng pakikibaka. Batay sa mga mungkahi at pagsusog ng masa, pinaunlad at nirebisa pa ang mga ito.

Binuo rin ang lupon ng mga negosyador mula sa mga sulong na elemento ng PKM at piling elemento ng grupong suporta. Ito ang grupong itinakdang humarap sa pakikipagnegosasyon sa mga panginoong maylupa. Ang grupo ay sumailalim sa malalimang pag-aaral sa pasikut-sikot ng balangkas ng mga kahilingan at pagsasanay sa negosasyon.

Ang lahat ng mga ito ay puspusang pinagsikapang maisagawa sa lihim, maingat at mapanlikhang mga paraan sa ilalim ng mahigpit na pagbabantay ng mga kaaway na militar. Kinailangan ding ilihim sa mga panginoong maylupa ang lahat ng paghahanda.

Nang matiyak ang sapat na antas ng pagkakaisa at kahandaan ng masang magsasaka, isinagawa ang asembleya ng paglulunsad ng PKM noong Disyembre 2007. Upang di magkaroon ng pagkakataong makapagkonsolida at makapagmaniobra ang mga panginoong maylupa, inilunsad ang pampulitikang mobilisasyon at pakikipagkumpronta sa mga panginoong maylupa makalipas ang dalawang araw. Sa kaniyang aksyong masa, naging matagumpay ang aktwal na kumprontasyon sa pagitan ng lupon ng negosyador at mga target na pangino-



ong maylupa.

Bilang dagdag na pansuhay sa nakamit na mga kasunduan sa negosasyon, nahikayat ang konseho ng barangay na ipatawag ang *barangay assembly* para pormal na isabatas sa pamamagitan ng ordinansa ang nakamit na mga tagumpay. Malaking tulong ito upang higit pang makamit ang pagkakaisa ng mga taumbaryo. Itinayo rin ang mga grupong may tungkuling sumubaybay sa pagpapatupad ng mga napagkasunduan.

Sa pagsusulong ng antipyudal na kampanya, nakapagpalitaw at nakapagsanay ng maraming lider-masa mula sa batayang saray at gitna/nakatataas na saray. Muling naitayo ang mga grupong pang-organisa at komiteng pang-organisa ng PKM, MAKIBAKA at Kabataang Makabayan (KM). Ang PKM sa bawat baryo ay may kasapiang 100-150 na nahahati sa 10-15 grupong magsasaka.

Epektibo ring naorganisa, nahimok at napakilos ang mga panggitnang pwersa tulad ng panggitna, nakatataas-na-panggitna at mayamang magsasaka, mga elementong petiburgis (tulad ng mga guro) at

mga kagawad sa konseho ng barangay.

Sumigla ang hukbong bayan sa lugar. Nakapagpalitaw ng bagong mga mandirigma. Naitayo rin ang yunit milisya sa baryo, at sa pakipagkoordinang platun gerilya ng BHB na sumasaklaw sa lugar ay nagsilbi itong pwersang panseguridad sa buong panahon ng kampanya. Sa pagtutulungan ng mga organisasyong masa, yunit milisya at platun-gerilya ng BHB, epektibong nalansag at nanyutralisa ang labat-paniktik ng kaaway sa lugar.

Sa sumunod na mga buwan pagkatapos ng matagumpay na antipyudal na pakikibaka, nakapag-rekluta ng bagong mga kasapi ng Partido at naitayo ang sangay ng Partido sa baryo. Epektibo ring naiugnay sa antipyudal na kampanya ang taktikang alyansa sa eleksyong pambarangay noong Oktubre 2007.

Mula sa mga aral na nakuha sa laban sa Barangay Mabuhay, mas napabilis at napaunlad pa ang kasunod na pakikibakang agraryo sa Barangay Silangan. Ang laban sa Barangay Mabuhay ay tumagal nang anim at kalahating buwan (mula Hulyo 2007 hanggang kalahating gitnaan ng Enero 2008). Samanta-



la, ang laban sa Barangay Sila-
ngan ay inabot lamang nang dala-
wa't kalahating buwan (mula ka-
lagitnaan ng Enero 2008 hang-
gang Marso). Dito, anim na pa-
nginoong maylupa ang hinarap sa
laban ng mga magsasaka, kabi-
lang na ang pinakamalaking pa-
nginoong maylupa roon na nag-
mamay-ari ng 36 na ektaryang ni-
yugan at palayan.

Bunga nitong mga nailunsad
na antipyudal na pakikibaka sa da-
lawang baryo, nagkaroon ng 30%
pagpapababa ng upa sa lupa sa ni-
yugan. Mula 67-33 na hatian sa
niyugan pabor sa may-ari ng lupa,
naipagtagumpay ang 55-45 na ha-
tian pabor sa mga kasamá. Nagka-
roon ng 20-30% na pagtaas ng sa-
hod sa iba't ibang tipo ng trabaho
sa niyugan at 100% pagtaas ng
sahod sa trabaho sa palayan. Nai-
taas din nang 100% ang arawang
sahod mula P50 tungong P100.

Naipagwagi ang dalawang bes-
ses na pagpapakain sa manggaga-
wang bukid mula sa dating isang
beses lamang. Di bababa sa 150
pamilya ng maralitang magsasaka,
mababang-panggitnang magsasa-
ka at manggagawang bukid ang
nakinabang sa mga tagumpay na
ito. Napahina ang pang-ekonomya
at pampulitikang kapit ng mga pa-
nginoong maylupa na naninirahan
sa baryo.

Mabisa ring napabulaanan ang
saywar ng kaaway na militar na
walang pagmamalasakit at pakia-
lam ang rebolusyonaryong kilusan
sa masang magsasaka sa lugar. Da-
hil sa nanyutalisang lambat-pa-
niktik at naramdamang paghina na
ng kontrol ng kaaway sa lugar, ni-
likas na rin nila ang isang susing
detatsment nila rito. Nabigyan ni-
to ng puwang ang BHB para lalo
pang mapabilis ang gawaing reko-
beri at pagsusulong ng rebolusyo-
naryong kilusan sa lugar. **AB**

Ruben "Ka April" Villaflores

Martir ng Sierra Madre

Enero 3, 1982 nang isilang si Ka April—Ruben Villaflores—na kila-
la rin sa kanyang mga pangalan sa pakikibakang "Ariel", "SF" at
"Sarah."

Lumaki siya sa hirap sa pusod
ng Sierra Madre at sa murang edad
ay natuto siyang maghanapbuhay
upang makatulong sa magulang.
Hindi na rin siya nakapagtapos ng
pag-aaral kahit hanggang elemen-
tarya.

Mabibigat ang kanyang naging
hanapbuhay sa matagal na pana-
hon tulad ng pagkokopra, pagka-
kahoy at pag-uuling.

Kaya naman nang una siyang
maugnayan ng Bagong Hukbong
Bayan (BHB) noong 2003 at ma-
paliwanagan hinggil sa ugat ng
kahirapan ng masang Pilipino,
agad niyang nasapol ang panga-
ngailangan ng rebolusyonaryong
armadong pakikibaka para lutasin
ito at walang pagdadalawang-isip
siyang naging Pulang mandirigma.

Bilang bagong rekrut, narana-
san niya ang ilang suliraning kara-
niwang kinakaharap ng mga ba-
gong mandirigma ng BHB. Sa pa-
nahong ito ay napagtanto rin niya
na siya ay isang bakla. Noong
2004, nagpasya siyang lumabas sa
BHB at umuwi sa kanyang mga
magulang.


Naugnayan siya sa ikalawang
pagkakataon noong 2005. Gumam-
pan muna siya ng ilang rebolu-
syonaryong gawain habang
naninirahan pa sa bar-
yo.

Noong Marso
2007 ay nagpasya si-
yang ipagpatuloy
ang nasimulang pa-
kikibaka. Hindi na-
gising sagabal ang
kanyang kasarian
sa kanyang pagde-

desisyon, at hindi rin ito itinuring
na balakid ng rebolusyonaryong
kilusang kumikilala sa pantay na
karapatan ng lahat na walang pag-
tatangi sa kasarian. Bagama't ma-
rami pa ring kinaharap na proble-
ma si Ka April sa kanyang muling
pagkilos, mas matatag na niyang
kinaharap ang mga ito at nanatili
ang kapasyahan niyang magling-
kod sa masa.

Pinakamatingkad niyang kala-
kasan ang kanyang pagiging ubod
ng sipag at maalalahanin. Naging
malapit siya sa mga magsasakang
nakikilala at nakakasalamuha niya
dahil sa inisyatiba niya lalo na sa
mga pang-araw-araw na gawain.

Naging libangan ni Ka April
ang pagkanta ng mga rebolusyo-
naryong awitin, pagpapatawa at
pagpapasaya



Ruben "Ka April" Villaflores

sa mga kasama. Kung minsan ay nauuwi ang biruan sa inisan subalit nareresolba naman ang mga lumilitaw na gusot.

Ilang araw bago mapalaban ang yunit na kinabibilangan ni Ka April, kinakitaan siya ng pangkaraniwang pag-aalala sa kapakanan ng mga kasama at pag-aasikaso sa kanila. Sa kabila ng mahigpit nang sitwasyon ay pinagsikapang niyang pagaanin ang loob ng mga kasama sa yunit sa pamamagitan ng kanyang pagpapatawa at pagiging masayahin.

Hulyo 31, sa Cagsiyay II, Mauban, Quezon, magdadala sana si Ka April ng pagkain sa mga kasama nang tamaan siya ng *signal fire* ng kaaway na noon ay nakapwesto na sa kanyang dadaanan. Nakapanlaban pa siya gamit ang kanyang baril. Kahit duguan na siya bunga ng tama ng bala ay nakaregroup siya sa yunit at naiatras pa siya ng mga kasama. Ngunit dahil sa tuluy-tuloy na putukan ay hindi siya agad naipagamot, kaya maraming dugo ang nawala sa kanya. Nalagutan siya ng hininga sa bisig ng mga kasamang pilit na nagdala sa kanya sa pagatras.

"Ito ang baril ko. Sabi ko naman sa inyo hindi ko ito ibibigay sa kaaway dahil ibabalik ko ito sa Partido," ang mga huling katagang nasambit niya habang nag-aagaw buhay na siya.

Sa pulong parangal na idinaos ng mga kasama para kay Ka April, isinumpa nilang hindi nila sasayangin ang kanyang buhay na inialay para sa Partido, sa rebolusyon at sa buong sambayanan.

Isa lamang si Ka April sa mga ikinararangal na mga kasama ng rebolusyonaryong kilusan na buong pusong nag-alay ng kanilang buhay para sa malawak na sambayanan na tulad niya ay biktima rin ng bulok na sistema ng lipunan. **AB**

Korapsyon sa Court of Appeals

Isang mahistrado ang sinibak, isa pa ang sinuspinde at tatlong binalaan matapos mabunyag ang tangkang suhulan sa Court of Appeals noong Hulyo. Ang suhulan ay bahagi ng manio-brahan ng pamilyang Lopez at ng pangkating Arroyo para sa kontrol ng Manila Electric Company (Meralco). Naging sentro ng imbestigasyon ang isinampang kaso ng Securities and Exchange Commission (SEC) para pigilan ang pagdaraos ng Meralco ng taunang *stock holders board elections* noong katapusan ng Mayo.

Sinibak ng Supreme Court (SC) noong Setyembre 9 si Court of Appeals (CA) Justice Vicente Roxas dahil umano sa kanyang "hindi pangkaraniwang interes" na hawakan ang kaso ng Government Service Insurance System (GSIS) at Meralco at sa kanyang "hindi maipaliwanag na pagmamadali" sa paggawad ng desisyon pabor sa kumpanya ng kuryente. Ngunit ginawaran lamang ng dalawang buwang suspensyon si CA Justice Jose Sabio, Jr. habang simpleng babala naman ang ipinataw sa tatlong iba pang mahistrado dahil sa "hindi magandang paghawak" nila

sa kasong isinampa ng SEC laban sa Meralco.

Minadali ng SC ang pagde-

desisyon sa kaso sa layuning maisalba ang korte at mapanatili ang anumang nalalabi pang respeto rito ng mamamayan. Agad na naglabas ng desisyon ang korte isang linggo pa lamang matapos maisumite ng mga nag-imbetiga ang kanilang ulat. Litaw na litaw ang panggigipit nito kay Roxas, na umaming tumanggi siyang sagutin ang mga tawag ng mga abugado ni Miguel "Mike" Arroyo, asawa ni Gloria Arroyo. Ayon kay Roxas, siya ang pinagbubuntunan ngayon ng sisi dahil hindi niya sinunod ang mga utos ng mag-asawang Arroyo. Sa kabilang banda, animo'y pitik lamang ang pagsuspendi kay Justice Sabio gayong siya ang inakusahang humingi ng ilampung milyon sa Meralco kapalit ng pagbibitiw niya sa kaso. Kaduda-duda rin ang ipinakita niyang di pangkaraniwang interes sa kaso tulad ng pagpililitan niyang hawakan pa rin ito kahit nakabalik na mula sa bakasyon si Roxas na siyang orihinal na may hawak nito.

Dumaan na sa pasikut-sikot ang kaso na nabunyag noon pang Hulyo 31. Sumambulat ito sa publiko nang ireklamo ni Justice Sabio ang umano'y tangkang panunuhol sa kanya ng isang negosyanteng tagapamagitan umano ni Oscar Lopez, presiden-



te at *chief executive officer* (CEO) ng Meralco. Aniya, inalok siya ng P10 milyon para bitiwang ang kasong isinampa ni Winston Garcia, presidente ng GSIS sa SEC laban sa idinaos na *stock holders board elections*.

Agad itong itinanggi ng pamilyang Lopez. Gayundin, lumantad ang itinuro ni Sabio na "tagapamagitan" at binaligtad ang kanyang akusasyon. Ayon sa tagapamagitan, si Sabio ang humingi hindi ng P10 milyon kundi P50 milyon kapalit ng kanyang pagbibitiw sa kaso.

Mas marami pang anomalya ang nabunyag nang simulan na ng Korte Suprema ang imbestigasyon. Maliban kay Roxas, nasangkot din dahil sa kani-kanilang mga koneksyon, interes at papel sa kaso ang ilang mga huwes ng 8th Division at 9th Division na sina Associate Justice Bienvenido Reyes, Associate Justice Myrna Dimaranan-Vidal at Presiding Justice Conrado Vasquez.

Litaw din sa pagmamadali ng Supreme Court ang pagnanais nitong iwasang maiugnay ang mag-asawang Arroyo at iba pang upisyal ng rehimen sa naganap na suhulan. Hindi na inimbestigahan ng korte ang direktang pakikialam ni Chairman Camilo Sabio ng Presidential Commission on Good Government sa kaso na hinawakan ng kapatid niyang si Justice Jose Sabio Jr. Inamin mismo ni Camilo na dalawang beses niyang tinawagan noong Mayo 30 ang kanyang nakababatang kapatid na si Jose Jr. Pakay niya umanong paliwanagan ito sa kawastuan ng pusisyon ng GSIS na agawin sa pamilyang Lopez ang pamamahala sa Meralco. Utos di umano sa kanya ni Atty. Jesus Santos, abogado ni Mike Arroyo, na kanyang tawagan ang kanyang nakababatang kapatid. Si Santos ay isang *trustee* ng GSIS at kumakatawan sa mga sapi ng guberno sa kumpanya.

Lalong nalantad sa mga pangyayari ang kabulukan ng buong reaksyunaryong sistema, kabilang ang hudikatura. Kitang-kita ang sabwatan ng mga mahistrado at ng mga reaksyunaryong nasa kapangyarihan—kapwa mga pinuno at malalaking burukrata sa guberno at mga makapangyarihang komprador—para isulong ang kani-kanilang mga interes. Ginagamit nila ang reaksyunaryong mga batas at institusyon para sa sariling kapakinabangan sa kapinsalaan ng bayan at upang pagtakpan ang kanilang mga krimen. **AB**

Mahigit P350 milyong anomalya sa "subsidyo" sa agrikultura

Batbat ng mga anomalya ang mga programa ng rehimeng Arroyo para sa "subsidyo" sa agrikultura. Nabunyag nitong unang hati ng Setyembre ng Commission on Audit (CoA) na may anomalya sa P135 milyong subsidyo ng guberno para sa mga binhi ng gulay. Ang subsidyong binhing ito ay ipinamahagi noong nakaraang taon sa ilalim ng programang "Gulayan ng Masa" ng rehimeng Arroyo.

Ayon sa CoA, walang impormasyon kung aktwal na natanggap ang mga ito ng mga benepisyaryong magsasaka. Hindi umano kumpleto ang 2007 na ulat ng Department of Agriculture (DA) tungkol sa listahan ng mga benepisyaryo nito at pati ang mga resibo ng mga yunit nito sa mga rehiyon. Kabilang sa mga rehiyong ito ang Cordillera Administrative Region (CAR), Cagayan Valley, Ilocos, Central Luzon, Southern Tagalog (ST), Western Visayas at Central Visayas, Northern Mindanao at Caraga Region.

Iniulat din ng Kilusang Magbubukid ng Pilipinas (KMP) sa Bicol na ni isa sa 120,000 myembro nito sa rehiyon ay walang natanggap na subsidyong binhi. Ani Felix Paz, tagapangulo ng KMP-Bicol, kalakaran na ng rehimeng Arroyo na isangkalan ang kahirapan ng mga magsasaka para bigyang-matwid ang paglalabas ng pera para sa korapsyon at pagpopondo sa eleksyon ng mga maka-administrasyong kandidato.

Natuklasan din ng CoA na di dumaan sa pampublikong pagsubasta ang pagkontrata sa mga tagasuplay. Wala o kulang din ang mga listahan ng umano'y mga benepisyaryo. Walang mga pangalang nakalista para sa ST, Bicol at CAR habang hindi naman mabasa ang sa ibang rehiyon.

Iniulat din ng CoA ang anomalya noong nakaraang taon sa pamamahagi umano ng mga *hybrid* na bigas, sertipikadong binhi at mga suplay sa pagsasaka na nagkahalaga ng P218.7 milyon. Puno rin ng mga pekeng lagda ang listahan ng umano'y mga benepisyaryo. Sa mga pinagtanungan sa Central Luzon, Southern Tagalog at Eastern Visayan, marami sa mga naiulat na nakatanggap ay nagsabing wala silang aktwal na natatanggap. Marami rin sa mga nagsabing may natanggap sila ay nag-ulat na maliit kumpara sa mga nakatala ang aktwal na tinanggap nila.

Bukod sa mga ito, mayroon pang P781.3 milyong alokasyon sa DA para rin umano sa programa sa pamamahagi ng binhi, abono at ipa pang suplay sa pagsasaka na hindi napakinabangan ng mga magsasaka dahil lubhang naantala, hindi na ipinatupad o bahagya lamang naipatupad. Walang ulat kung nasaan na ang pondong ito. **AB**

Mga biktima ng pagtatrabaho sa Hanjin

Mula nang itatag ang Hanjin Heavy Industries and Construction Philippines-Incorporated (HHIC-Phil Inc. o Hanjin), 15 manggagawa na nito ang nasawi sa iba't ibang mga aksidente sa pagtatrabaho. Pinakahuli rito si Efren de la Cruz na nakur-yente at namatay noong Agosto 12. Para umiwas sa sisi, pinalalabas ng maneydsment ng Hanjin na atake raw sa puso ang ikinamatay ng biktima.

Katunayan, ang pagkamatay at pinsalang tinamo ng maraming manggagawa sa Hanjin ay bunga ng kapabayaang ng kumpanya. Komun sa lahat ng namatay sa trabaho sa pagawaan ang kawalan nila ng mga gamit pangkaligtasan o *personal protective equipment* (PPE). Ito ay sa kabila ng maselan at napakadelikadong kalagayan sa trabaho. Kaliwa't kanan ang nagtatayuang mga istrukturang bakal at mabibilis ang takbo at kilos ng mga sasakyang pangkonstruksyon. Bukod sa mabilisan ang trabaho dahil may hinahabol na dedlayn, kadalasa'y ginagawa pa ito sa matataas na lugar.

Nang una itong itatag, wala man lamang pasilidad medikal sa loob ng pabrika na maaari sanang sumaklolo sa mga aksidente. Napilitan na lamang magtayo ng klinik ang Hanjin matapos mabunyag sa publiko ang delikadong katayuan ng mga manggagawa roon.

Sa kabila ng lumalalang kalagayan ng mga manggagawa sa Hanjin, walang ginawang mapagpas-yang aksyon ang rehimeng Arroyo. Sa halip na imbestigahan at bigyan ng karampatang parusa, ipinagmalaki at pinuri pa ni Gloria Arroyo ang Hanjin sa kanyang State of the Nation Address noong Hulyo. Nagdala umano ito ng puhunan sa banda at lumikha ng maraming traba-

ho—dalawang bagay na kaila-ngang-kailangan sa pagsusuhay ng kanyang rehimen.

Ang Hanjin/HHIC-Phil. Inc. ay lokal na kumpanya ng Hanjin Group, isang dambuhalang kumpanyang Koreano. Nakapailalim ito sa Hanjin Shipping na gumagawa at nagkukumpuni ng barko. Ito ang pinakamalaking tuwirang dayuhang pamumuhunan sa bansa. Umuupa ito ng pasilidad sa Subic Freeport Zone sa Zambales sa loob ng 50 taon. Itinayo nito ang pagawaan na pagkukumpunihan ng barko noong 2005. Nitong maagang bahagi ng 2008, nagsimula na itong gumawa at magkumpuni ng mga barko sa Subic Bay. Tinatayang aabot sa 20,000 manggagawa ang kakailanganin nito. Nagkakahalaga ng \$1.6 bilyon ang ipinuhunan nito sa Subic.

Batbat ng anomalya at napakaraming kaso ng korapsyon ang pamumuhunan ng Hanjin sa bansa. Napilitan ang Subic Bay Metropolitan Authority na suspindehin ito matapos ang sunud-sunod na mga aksidente sa pagawaan. Natuklasan na walang karampatang permiso at mga dokumento ang pagpapatayo nito ng hotel sa loob ng gubat ng Subic. Gayundin, napabalitang si-

nuhulan nito ang mga lokal na upisyal sa Misamis Oriental para makapagpatayo ito ng pagawaan sa Phividec Industrial Estate sa Tagoloan, Misamis Oriental. Handa umano itong magbuhos ng \$2 bilyon para rito. Ayon sa pahayag nito, aabot sa 30,000 manggagawa ang kakailanganin sa pagawaan nito rito.

Halos lahat ng mga manggagawa sa Hanjin ay mga kontraktwal na dumadaan sa mga *subcontractors*. Sa gayon, walang direktang panagutan ang Hanjin sa mga manggagawa. Umaabot na sa 42 ang mga kasosyong *subcontractors* ng Hanjin. Marami rin sa mga ito ay Koreano na kinukutsaba nila upang higit na makatipid at makaiwas sa mga dagdag na sahod at benepisyo.

Sa pagsisikap ng mga manggagawa na mapangalagaan ang kanilang kaligtasan at mapabuti ang kanilang pang-ekonomyang kalagayan, nagtayo sila ng unyon noong Hulyo 6, 2006. Pero kaagad itong sinupil ng maneydsment. Labing-apat na mga lider at myembro ng unyon ang kinasuhan at tinanggal sa trabaho. Pinepresyur at pinagbibitiw sa unyon ang iba pang mga kasapi. Dumaranas sila ngayon ng iba't ibang porma ng panggigipit. **AB**

Iligal na pagsibak sa mga manggagawa, tinutulan ng KMU

NILUSOB ng mga nagpipiket na myembro ng Kilusang Mayo Uno (KMU) ang upisina ng Kowloon Restaurant sa West Avenue, Quezon City nitong Setyembre 17 para igiit ang pagbabalik sa trabaho ng 73 manggagawa ng restawran na sinesante. Sinibak ang mga manggagawa noong Setyembre 13.

Nagprotesta ang mga manggagawa ng Kowloon noong Hunyo para igiit ang pagpapatupad ng kumpanya sa dalawang pinakahuling Wage Increase Order sa National Capital Region. Kahit ang protesta ay inilunsad habang *off-duty* ang mga manggagawa at hindi nakaapekto sa operasyon ng restawran, pinatalsik sila ng maneydsment at kinasuhan ng paglulunsad ng iligal na welga at iligal na pagtitipon.

Anang KMU, napakaliit na nga ng umentong ibinibigay ng mga *wage board* ay hindi pa ito maipatupad ng ganid na kumpanya. **AB**



Ibayong pagbulusok ng ekonomya ng US



Mabilis na bumubulusok ang ekonomya ng US at buong pandaigdigang sistemang kapitalista. Dumaraan ito ngayon sa isa sa pinakamatitinding krisis pampinansya mula pa noong panahon ng Great Depression noong dekada 1930.

Nagsibagsakan ang malalaking bangko at institusyong pampinansya at nayanig ang mga pangunahing *stock market* nitong ikatlong linggo ng Setyembre. Tinatayang lalo pang lalala ang pagkasadlak na sa resesyon ng ekonomya ng US at lalala pa pagsapit ng 2009.

Ang lumalalang malawakang pagkalugi ng mga kumpanya sa pinansya at pagbulusok ng pamilihan ng mga sapi sa US at ibang bahagi ng mundo ay salamin lamang ng krisis na humahambalos ngayon sa kabuuan ng ekonomya sa US at pandaigdigang sistemang kapitalista. Kinatatangian ito ng pagbagal ng produksyon, paglaki ng disem-

pleyo, pagtumul ng pamilihan, pagguho ng kapital at pagtindi ng kahirapan ng mamamayan.

Pagbagsak ng mga kumpanya sa pinansya. Umaabot sa halos 120 na ang nagipit na bangko at kumpanya sa pinansya sa US. Nitong taon, bumagsak na ang sampung malalaking bangko kabilang ang tatlo sa limang pinakamalalaki: ang Lehman Brothers na nabangkarote nitong Setyembre—ang pinakamalaking pagkabangkarote sa kasaysayan—ang Bear Stearns na nilamon ng JC Morgan Chase noong Mayo at ang Merrill Lynch na nilamon ng Bank of America nitong Setyembre.

Nalagay din sa bingit ng pagbagsak ang Freddie Mac (Federal Home Loan Mortgage Corporation), Fannie May (Federal National Mortgage Association) at ang American International Group (AIG)—ang pinakamalaking kumpanya sa seguro sa buong mundo. Nanga-

nganib ding bumagsak ang Morgan Stanley, ang pangalawang pinakamalaking bangko sa US.

Ibinunsod ang mga pagkaluging ito ng pag-alagwa ng pagpautang at ng susun-susun na pagkakalakal ng mga papeles sa pautang at maraming anomalya sa mga ito. Umabot sa \$12-15 trilyon ang ipinuhunan dito. Hanggang 25% nito ang di na mabayaran na nagresulta sa tinatayang \$1.5 trilyong pagkalugi ng mga ito. Sa buong bansa, nakatiwangwang ang 18.6 milyong bahay—pinakamalaki na sa buong kasaysayan. Sa bilang na ito, 14 milyon ang di maibenta at 4.2 milyon ang inilit. Tinatayang mahigit tatlong milyon ang maililit pa sa pagtatapos ng taon. Mula 2005, taun-taon ay dumadausdos nang 25% ang presyo ng mga bahay—halos kapantay na ng panahon bago ang Great Depression.

Lumalalang disempleyo at pagliit ng produksyon. Patuloy na lumalala ang disempleyo sa US na umaabot na sa 6.1%—pinakamataas nitong nagdaang limang taon. Noong isang taon, may karagdang isang milyong manggagawa ang nawalan ng trabaho. Tinatayang isang milyon pa ang mawawalan ng hanapbuhay ngayong 2008 dulot ng patuloy na pagtumul ng produksyon.

Noong nakaraang walong taon, nakalikha lamang ng limang milyong bagong empleyo ang ekonomya ng US. Nitong Setyembre, nasa mahigit 75% lamang ang nagagamit sa kapasidad sa produksyong industriyal ng US. Pinakamababa na ito sa loob ng apat na taon. Pangunahing humatak sa pagdausdos na ito ang 11.9% pagbaba sa produksyon ng mga kumpanyang gumagawa ng



sasakyan. Ang mga pagbabang ito tuloy na maramihang tanggapan ng sa produksyon ay nagdudulot ng mga manggagawa sa US.

Lagpas sa trilyong dolyar na pansalba sa mga kapitalista sa pinansya

Nagkukumahog ang gubyrno ng US at mga pangunahing imperyalistang bansa na magbuhos ng pondo upang pigilan ang lalo pang pagsadsad ng pandaigdigang sistemang kapitalista. Tinatayang aabot sa halos \$1.3 trilyon ang kabuuang ilalaan ng gubyrnong Bush para isalba ang mala-lintang mga monopolyong kapitalista sa pinansya at ang sistemang pampinansya ng US.

Mula ikalawang kwarto ng 2008, nakapaglaan na ang Federal Reserve ng mahigit \$300 bilyon upang pondohan ang pagsalba sa ilang malalaking kumpanya. Naglaan ito ng \$29 bilyon upang pondohan ang pagbili ng JC Morgan Chase sa bumagsak na Bear Stearns. Nitong Setyembre, nagbuhos ito ng \$200 bilyon—pinakamalaki sa kasaysayan—upang isalba ang Freddie Mac at Fannie Mae. Pagkatapos, pinautang nito ng \$85 bilyon ang AIG kapalit ng kontrol sa 80% ng pag-aari ng kumpanya.

Inianunsyo rin ng gubyrnong US na tutulungan nito ang mga naluluging bangko at kumpanya sa pinansya sa pamamagitan ng pag-ako ng mga pautang nito hanggang sa tuluyang pagbili ng mga inilit na ari-arian ng mga ito na napakahirap nang ibenta. Binabalak na dagdagan pa ng \$700 bilyon ang pondong ilalaan sa pagsalba.

Nitong nakalipas lamang na mga araw, naglaan ang Federal Reserve ng \$180 bilyong ambag sa pondong gagamitin upang pasiglahin ang mga pamilihang pampinansya. Bukod sa nauna nang ibinuhos na \$600 bilyon, nag-ambag din ng \$120 bilyon sa pondong ito ang mga bangko sentral ng Japan, European Union, Canada at Switzerland. Partikular na layunin ng US at iba pang imperyalistang bansa ang patatagin ang halaga ng US *dollar* at pakalmahin ang mga pamilihang pampinansyang nakabatay dito, sa pangambang hilahin ng pagdausdos ng mga ito ang buong sistemang pampinansya.

Ang mga hakbanging ito ay pansamantalang makapapipigil lamang sa patuloy na pagdausdos ng US *dollar* at ng pinakamalalaking pamilihan ng mga sapi at iba pang pampinansyang pamilihang nakabatay dito. Ngunit matagalang pinsala ang idudulot ng mga ito sa ekonomya at kagalingan ng mamamayan. Ang umaabot na sa trilyong dolyar na ibinubuhos ng Federal Reserve ay lalo lamang magpapalala sa malaki nang depisit sa pinansya ng gubyrno, magpapahina sa US *dollar* at magkakait ng mga pondong dapat mapunta sa kagalingan ng mamamayan.

Habang sinasalba ang mga lintang kapitalista sa pinansya, daan-daang bilyon hanggang trilyong dolyar ang ipinagkakait sa mamamayan. At dahil walang mga hakbanging makapagpapasigla sa tunay na ekonomya—ang produksyon, empleyo, konsumo at kagalingan ng mamamayan—lalong dadalas ang pagputok ng siklikong krisis ng kapitalismo na magdudulot ng papalaking mga pagyanig sa buong mundo. **AB**

Pagtumal ng pamilihan. Ang kumpanya ng mga konsyumer sa US ay nasa pinakamababang antas ngayon sa loob ng 26 na taon. Sa desperasyong mapasigla ang konsumo upang maengganyo ang produksyon at pag-ahon ng ekonomya, naglaan ang gubyrnong Bush noong Abril ng \$168 bilyong pondo (sa anyo ng *tax rebate* o isinauling buwis). Bahagya nitong pinasigla ang ekonomya noong ikalawang kwarto ng taon.

Ngunit bago pa man ang Agosto, nagpatuloy ang pagtumal ng pamilihan, makaraang masaid ang artipisyal at panandaliang pabuwang ito. Tumataas ang presyo ng mga kalakal sa bilis na walang kaptantay nitong nagdaang tatlong dekada. Nitong Agosto, bumaba nang 0.3% ang bentahan sa pamilihan. Bumagsak nang 2.5% ang konsumo ng gasolina. Bumagsak din nang 2.2% ang benta ng mga produktong pambahay, elektroniko at mga *appliance*. Bumaba nang 0.3% ang bentahan ng damit. Sa harap ng nagtataasang mga presyo, nagtuon na lamang ang mga mamimili sa mga saligang bilihan.

Ang tuluy-tuloy na pagtaas ng presyo ng mga sasakyan at gasolina ay nagresulta rin sa malaking pagbaba sa bentahan ng mga sasakyan. Kumpara noong nakaraang taon, nitong Agosto bumagsak nang 34.5% ang benta ng mga sasakyan sa Chrysler, 20.3% sa General Motors, 26.5% sa Ford, 9.4% sa Toyota, at 7.3% sa Honda.

Paglaganap ng krisis sa daigdig. Ang dambuhalang pagkayanig sa US ay nagbubunga ng mga katulad na ring paglindol sa kabuuan ng pandaigdigang sistemang kapitalista. Isang katulad na krisis pampinansya ang humahambalos ngayon sa European Union, Japan at iba pang bansa. Nitong Setyembre, sabay-sabay na



dumausdos ang mga pangunahing *stock market*. Marami na ring malalaking bangko at kumpanya sa pinansya sa Europe ang nanganganib bumagsak. Pansamantalang nakaahon na lamang muli ang mga ito ngayon dulot ng malakihang paglalabas ng pondo ng mga bangko sentral sa US, Europe at Asia.

Ang HSBC, pinakamalaking bangko sa Europe, ay hinambalos ng \$3.4 bilyong pagkalugi noong 2007, bunga ng pagpipinansya nito ng mga sanla sa pabahay sa US. Naghahanap pa ito ngayon ng kumpanyang bibili rito. Naglaho ang \$1.6 bilyong puhunan ng pitong bangko sa Japan sa nabangkaroteng Lehman Brothers. Nanganib naman ang \$1.056 trilyong ipinuhunan ng malalaking bangko ng Japan sa Freddie Mac at Fannie Mae, gayundin ang \$107 bilyong kabuuang ipinuhunan ng China sa mga sanla sa US.

Sa kauna-unahang pagkakataon mula nang mabuo noong 1999, ang ekonomya sa Eurozone (kulumpon ng 15 bayan sa Europe na gumagamit ng salaping Euro) ay lumiit nang 0.2% nitong ikalawang kwarto at tinatayang tuluwang sasadsad na sa resesyon sa darating na mga buwan. Ang ekonomya ng Germany ay lumiit nang 0.5% at inaasahang muling hantong sa resesyon makaraan ang limang taon. Lumiit din nang 0.3% ang mga ekonomya ng France at Italy, habang tigil (0.0%) ang ekonomya ng The Netherlands. Halos walang paglaki (0.2%) ang ekonomya ng UK at inaasahang papasok na rin ito sa resesyon sa katapusan ng taon.

Dumaranas ngayon ang ekonomya ng Japan ng pinakamabilis na pagbulusok nito mula noong 2001 nang huling masadlak ito sa resesyon. AB

Sundalo ng US na nahatulan ng *rape*, di matagpuan

NAWAWALA si Lance Cpl. Daniel Smith, ang Amerikanong sundalong nahatulan sa panggagahasa sa Pilipinang si "Nicole" sa Olongapo City noong Nobyembre 2005. Pinetisyon ng mga abugado ni "Nicole" ang Korte Suprema na pagpaliwanagin ang gubyernong Arroyo sa pagkawala ni Smith.

Nakadetine si Smith sa loob ng US Embassy, taliwas sa kautusan ng korteng humatol sa kanya na ikulong na siya sa bilangguan. Subalit may nakapagsabi kay Atty. Harry Roque, isa sa mga abugadong naghain ng petisyon, na si Smith ay kasalukuyan nang tumitira sa Quezon City. Hiniling niya sa Korte Suprema na linawin ng gubyerno kung saan nga nakadetine ngayon si Smith.

3 obispo, suportado ang pagbasura sa VAT

SINUSUPORTAHAN ng tatlong obispo ng simbahan Katoliko ang panawagan ng iba't ibang mga organisasyon ng mamamayan kabilang ang mga maralitang lunsod na ibasura ang *value-added tax* (VAT). Anila'y dapat nang itigil ng gubyernong Arroyo ang pagsingil ng pabigat na 12% buwis sa bawat produktong binibili ng mamamayang Pilipino para hindi na sila lalong dumanas ng kahirapan sa harap ng pananalasa ngayon ng krisis pampinansya sa buong mundo.

Ipinahayag nina Bishop Deogracias Iñiguez ng Caloocan, Bishop Antonio Tobias ng Novaliches at Auxilliary Bishop Broderick Pabillo ng Maynila ang panawagang kontra-VAT nang dumalo sila sa "Communal Prayer and Action Against VAT" na inorganisa ng People's Caravan for Truth, Justice and Change sa simbahan ng Malate, Manila noong Setyembre 17.

Mga Fil-Am, sumali sa mga rali-protesta sa US laban sa interbensyon ng US sa Pilipinas

SUMALI ang mga Pilipino-Amerikanong kasapi ng Bagong Alyansang Makabayan (BAYAN)-USA Chapter sa mga rali-protesta sa paligid ng Republican National Convention noong Setyembre 2 sa St. Paul, Minnesota, USA para ipanawagang tigilan na ng gubyernong US ang pakikialam sa gubyerno ng Pilipinas. Sa harap ng mahigit 30,000 ralyista, nagsalita si Kuusela Hilo, pangalawang kalihim ng BAYAN-USA, para kumbinsihin ang gubyerno ng US at sinumang papalit na presidente ng bansa na iatras na ang anumang porma ng suporta sa rehimeng Arroyo. Iginiit din niya ang pagtigil ng suporta sa mga kontra-insureksyong kanyang ng rehimen partikular sa katimugang bahagi ng Mindanao.

Pagkatapos ng rali sa harapan ng Minnesota State Capitol Building, ipinagpatuloy ng mga aktibista ang kanilang mga protesta sa pagmartsa sa Xcel Center, ang sentro ng kumbensyon ng Republican Party. Kasama ng mga Pilipino-Amerikano ang mga kasapi ng United for Peace and Justice, Troops Out Now Coalition, Latinos Against the War, (LAW), Iraq Veterans Against the War (IVAW), American Indian Movement (AIM), ANSWER (Act Now to Stop War and End Racism) Coalition at marami pang mga grupo at unyon ng mga manggagawa.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXIX Blg. 18
Setyembre 21, 2008
www.philippinerevolution.net

Editorial

Labanan ang interbensyong militar ng US sa bansa



Taliwas sa pinalalabas na pansamantala lamang ang mga “bumibisitang” tropang Amerikano sa bansa, permanente nang nakaistasyon sa Pilipinas ang mga ito. Mula noong 2001, nang turan ng rehimeng Bush ang Pilipinas bilang “ikalawang larangan” ng pandaigdigang teroristang gera ng US, papalaki at papalawak ang pagtulak at paglahok ng mga tropang Amerikano sa panggegera ng Armed Forces of the Philippines (AFP) sa mga armadong pwersa sa Mindanao.

Imbwelto ang mga tropang Amerikano sa paniniktik, pag-aarmas at pagsasanay ng mga sundalo ng AFP. Tuwiran silang lumalahok sa mga operasyong pangkombat. Dahil sa permanenteng presensyang militar nito sa Pilipinas, nagagawa ng US na suhayan ang papet na rehimen at protektahan ang kapangyarihan ng US sa Southeast Asia.

Ang tuluy-tuloy na presensya ng mga tropang ito sa bansa ay binibigyang-matwid ng Visiting Forces Agreement (VFA) na minamaniobra at iniikutan kailanman naisin ng US.

Kinukomoplahe ang kanilang permanenteng presensya sa anyo ng pana-panahong “joint military exercises” na inilulunsad ilambeses sa isang taon.

Ang pangmatagalan nang mga tropang militar ng US sa bansa ay kabilang sa Joint Special Operations Task Force-Philippines (JSOTF-P). Itinayo ito mula sa halos kalahati ng 1,200-kataong pwersa ng Joint Task Force-510 (JTF-510) na ipinadala sa Mindanao ng US Pacific Command noong Enero 2002 at nanatili roon hanggang Hulyo 2002. Naging tungkulin ng JTF-510 na “hawanin” ang isla para sa paglulunsad ng “Operation Enduring Freedom-Philippines.”

Ginagamit ng mga tropang Amerikano sa JSOTF-P ang

**Mga tampok sa
isyung ito...**

Antipyudal na
pakikibaka sa Eastern
Samar PAHINA 6

Korapsyon sa Court
of Appeals PAHINA 9

Ibayong pagbulusok
ng ekonomya ng US
PAHINA 12

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*